





聖宋名賢五百家播芳大全文粹卷八十七

上啟

贄見教授啟

唐清臣

威鳳景星已快爭先之睹泰山北斗幸酬仰止之心  
久欽附驥之誠茲遂攀龍之願輒修尺贄聊叙寸悰  
竊以傳道授受惟其師化民成俗由于學陶鈍成利  
而質無留礦揉曲為直而材必中繩自非學者之宗  
曷畀師儒之選招諸生而列其下皆賴漸摩取一人





而拔其尤悉歸教育恭惟 某官游夏淵源之學孟  
荀羽翼之師川媚山輝夙蘊珠璣之美日光玉潔更  
多締繪之文發藻賢關青錢累中挾章宸陛丹桂高  
攀暫淹黃舍之談經偶進玉堂之視草光騰分野應  
千里之文星霧蓄襟懷布一城之教雨仁見綸言之  
迅召未容鄉校之久留某豈意微蹤獲瞻正矩負畫  
虎類狗之態無毀瓦畫墁之謀鉛刀尚冀於陶鎔駕  
駕猶資于鞭策與其進也庶銷學圃之心從而師之

願預摳衣之列

贄見縣宰啟

崔魯卿

百里字民久服神明之化一廛受地未修桑梓之恭  
茲執贄以踵門敢因文而見意恭惟 知縣學士先  
生用儒飾吏以道覺民蘊籍乎前輩忠厚之風騰踏  
乎中原太平之日冲襟雅量眇萬物而溢九州筆陣  
詞章揮千軍而流三峽才無施而不可治所至而有  
聲金馬玉堂盍升華近銅章墨綬暫屈承宣惟同鄉



凋瘵之餘賴單父循良之治公私兼富何必去珠而  
復還刑罰不施自可鳴琴而坐治四民咸樂於善政  
一同如在于春臺聞武城之絃歌已凝嘉績作商巖  
之靈雨行板祖風某鈇槩小儒簪裳墜緒幸不習農  
商工賈之業粗知求仁義禮樂之原覽惠子之五車  
摧鋒彌苦破少陵之百卷下筆愈難未能自致身于  
青雲何以慰倚門之白髮人方共棄志乃益堅故欲  
見天下之英豪庶可卜終身之窮達幸託部封之內

獲依師帥之賢念勢隔于雲泥終未瞻於山斗茲者  
不知其貧賤率然進拜于光儀李元禮之龍門獨高  
容接許子將之月旦更在品題情悰欲言楮毫莫既

贄見縣丞啟

黃子才

一塵同井每懷葵藿之心九里潤河密託扮揄之蔭  
論交夙佩于傾蓋向風切慕于執鞭幸許登龍敢希  
附驥恭惟 某官山亭流派魏國傳芳葉藉七葉貂  
蟬之貴而自視歉然摘百篇錦繡之文而成推作者



藍田松竹嘗助吟哦畿邑江山悉歸詞藻德高里閭  
所居盡仰其仁人治表縉紳有識舉揚其善政四海  
雁列萬里鵬搏州縣之職豈久徒勞公侯之費後必  
復其始牙籤萬軸家傳豈在於滿籬蘭玉一枝門大  
當容于駟馬益新闕閱煥寵鄉邦某遇合歷年服膺  
有日自惟旅進旅退履勤公子屣履之迎仰期三沐  
三薰當効門人摳衣之請輒修尺贄聊表寸誠伏望  
宏量矜愚深情悼屈未酬宿券敢伸瓦礫之投猶冀

餘波俾託沙泥之死為幸多矣何日忘之

起居秦丞相啟

劉韶美

孤城遐守越在天涯潭府具瞻邈然雲表視仙凡而  
有間問苗鼎以何從天地之正氣在人自有開闔陰  
陽之妙君臣之嘉會以德固宜感格神明之休而况  
忠信城池外閑宗社仁義膏澤兼濟華夷以茲超軼  
之勲宜獲盛多之福 某官誠叅覆載謀合聖神行  
孔孟之微言立伊周之難事當機會未分于禍福以



身任之自戎衣馴致于和平其心勞矣緒餘及物炳  
煥如春未聞草芥之微不在陶鎔之數某天資庸陋  
門緒凋零蟬脫塵沙之區蚊負叩山之惠尚歎九霄  
之迫絕恨無兩翅之高騫當春令之融怡阻台躔之  
問訊治之養性固知出造化之深機為國與民豈敢  
廢興歌之善頌

起居秦丞相啟

鄭敦夫

百官歛版曾陪東國之後塵上相提衡偶忝南州之

半刺得非所望喜不自勝辭履烏之未幾戀門墻而  
彌切恭惟 某官孤忠許國一德享天尼父自生民  
而來阿衡任天下之重節義出處神明扶持兼全夷  
夏之生靈坐致基圜之晏粲觀風雲之際會度越古  
今盡日月之照臨咸歸陶鑄某自憐鯁士素賴鴻儒  
鈞惟先人曾蒙坎北之私故賤子得與提携之末幾  
三山之節鉞可謂顯榮餘百指之妻孥皆合妻孥皆  
飽煖邱山之賜骨肉已銘眷惟商律之正行緬惟想



化機之多暇兩儀並贊百蹟咸宜善頌惟深陳言不  
既

起居丞相啟

周茂真

竊叨大造獲佐郡條仰戴深仁猥霑祿食念居官之  
既久蓋揣已以誠慚幸與斯民各得其職咸識升平  
之樂一無患苦之虞凡此所蒙未知為報徒勤夙夕  
以赴事功曷有須臾可忘恩紀顧惟無狀深寔此心  
瞻仰父師蒙夢寐墻屏獨於上下之分在所當嚴故

惟咫尺之書不敢時進恭惟尊居廊廟誠恪穹祇陰  
相其身厚介之福 某官學優孔孟道邁伊周得千  
載之時而志已畢行有萬世之功而古所未見而乃  
益為恭儉不自滿盈盛德有容小心事上輔皇圖于  
既固扶帝室以彌尊益致無彊之休永隆可大之業  
勲德若爾壽嘏稱茲某趨拜未期傾依尤切冀為廟  
社增輔寢饗上副九重之心下答輿人之意

起居昭文相公啟

宋 祁



伏以函宇乂安協氣翔舞四鄙弗竦九扈告成仰至  
治之日躋惟宗工之時乂 某官茂總民極翊宣帝  
華奮之為昌言大猷歌之為六府三事是以方國騰  
頌神明効祥截然棟隆屹若山立格高穹而底績暢  
熙載以無疆某遠播州條夙承公蔭身限江漢心馳  
門闌通謁末長禱懇滋極

起居沈侍郎啟

任子淵

飄零河海嘗瞻英偉之風自致雲霄倏異等差之分

悵萬里音塵之隔勞八年寤寐之思寂無書郵仰倏  
記室顧難冒于法義非自疎于仁賢今茲守邦乃幸  
接壤承流宣化古循吏之可師卹難分災大諸侯之  
足倚敢憑竿牘少薦悃悰恭惟 某官器宇沉涵襟  
靈韶潤三科論事家傳既濟之風八詠裁詩世擅休  
文之義出偶亨嘉之運超登華要之途忠言嘉謀日  
聞于內朝清德雅望風動于動時多士寵參大計茂  
著能聲粟腐錢流國有累年之蓄衣餘食足民無加



賦之憂輒自九重屬當一面用慰具瞻之望即為登  
進之階將使海內均被其埏鎔豈但蜀中興歌于襦  
袴某受知有素懷祿忘歸晚晚年華迫西山之短景  
迂疎政術借東壁之餘光

起居葉侍郎啟

趙承之

驟違恩館遽易歲華川陸阻修既無緣仰瞻履舄置  
郵疏濶又不獲時候起居心搖如旌汗浹如于背維  
春之仲在陽乃舒欽惟里第熱安琳宮休暇神明相

右戩穀繁多恭以 某官迪德高明養氣閱大卓爾  
見乎事業沛然溢于文詞不肯吐剛而茹柔舉之者  
山甫未嘗喜事而蘊已忠矣乎子文雍容大鄉之江  
濱追逐故鄉之樂父老迎拜正夸萊子之綵衣吏民  
聳觀曾侍玉堂之香案竝奉賜環之召遂膺補袞之  
求某嘆喏腐儒侵尋老境顧奉事以良晚荷察知之  
獨深駿茂片言了無僥倖山公密啟驟賜品題方深  
祭竈之榮遽起戀軒之歡報將軍以國士敢自比于



昔賢歸主人之舊巢冀不慚于他日方畏簡書之守  
未遑門館之趨顧調護于寢養益綏將于履福載惟  
約結靡所究陳

起居入國郭龍圖啟

葉少蘊

伏承親奉朝言竭趨遼悵違漆墀之鷺序度朔漢之  
龍沙方履道途諒疲筭轡忠蓋固膺於神佑興居倍  
協于天和伏以 某官儒術宗工士林宿望行誼聞  
于天下智畧湊于上前慮切事幾議通國體况寵臨

之在邇屬行李之方勤適在燁炎冀加頤愛

起居兩府啟

李成季

仰泰階之焜耀目遠鈞庭奉使節以周旋身勞塵鞅  
稍易寒溫之序未修咫尺之書每思犯分以陳情反  
畏黷尊而取戾雖江湖之量無待細流之歸而燕雀  
之軀寧忘大廈之託徬徨滋久畏惕益深與其自息  
而不言未若以誠而歸罪恭惟 某官著龜舊德柱  
石元勳焚千載以有為躋四方以無競君子在位士



皆樂用其材百姓既安民罔不同于善道行而政舉  
法具而官修百穀順成四夷內附在蕭曹近用不過  
填以為無如房杜淺能何所施其素業粵惟盛際允  
屬元臣三代可追不獨稱于兩漢大章繼作方有賴  
于一夔某擣櫟散材墳壚惡埴猥叨匠斲竊累陶埴  
誓殫夙夜之勤不忘頂踵之報高秋在序福履是宜  
尚期寢饋之以時俯慰士民之所望

起居祕監啟

賀允中

藏室蓬萊唐館峻清華之望泰山北斗韓門極瞻仰  
之心倘慕義于一朝愈聞風于百世敢修竿牘少薦  
精誠竊以北辰樞極之庭東壁圖書之府天垂象以  
經緯聖作則以鋪張採掇無遺搜羅殆盡盛蘭臺以  
之萃聚重芸閣之討論自三墳五典皆得其傳至諸  
子百家時各有用金匱石室之藏甚秘漆書竹簡之  
蹟猶存洋洋然儒藝之淵源廣廣乎聖賢之間域幸  
斯文之未喪屬吾道之將興必得真賢以贊盛事恭



惟某官祕監先生受天間氣為世聞人學通今古而大醇識造精微而自得一門鍾秀得非清白子孫二陸馳聲端自文章兄弟自古特稱望姓殆今最號名家負醕儒資已襲芳于詞伯真夫手筆更增美于許公簡在淵衷擢膺臚仕敷教法于江浙貳學政于成均大有故人出其類則拔其萃故無棄物虛而往者寔而歸凡與門墻悉歸模範既聯華于冊府尤藹譽于搢紳共欽元禮之聲名想見紫芝之眉宇不逐

解顏之一笑但知引吭以長鳴某蓬華鯁生岷岷冷族為貧于祿既壯登科緣胃選于賢關亦抗顏于泮水潛心自苦晞董子之下帷用力徒勞類宋人之刻楮比棒二天之公檄俾搜四庫之遺編誓殫聞見之私蔑有涓埃之補望洋而嘆撫已自驚顧惟朽枿之資遠記慶雲之瘡刻心竦慕翹首仰瞻擁篲掃門未快登龍之望因風奏記敢希附驥之榮

起居李帥啟

李成季



一違鈞座再閱歲華久撓俗吏之簿書幾塵小夫之  
竿牘盈尺之子安能自寫其肺腸萬頃之波固亦不  
遺于污潦憂皇所載展轉益危與其自棄而不言孰  
若以誠而歸罪恭惟 某官生民先覺盛世元臣吐  
辭為經鄙苟揚之未粹以道致主非堯舜而不陳經  
綸以四海為心進退有古人之節前功未孰毅然待  
旦而行厥政已成率爾乞身而去暨資舊德作鎮別  
都時驅大府之旌牙坐嘯昔遊之泉石腹心之托曾

未聞于須臾天日之光常不違于咫尺精神相感寤  
寐不忘宜一德之有承乘三陽之並進為天下許必  
資良弼之才以我公歸永作生民之福某素慙菲陋  
曲被陶成每殫十駕之勤愧乏一毫之補輒鮒得水  
雖竊幸于餘波胡馬嘶風終不忘于故國限拘官守  
阻造賓庭

起居帥座啟

楊萬里

望三光五嶽之氣無日不仰于緒風隔千巖萬壑之



雲此意獨馳于清夢亦知寓書獨莫如于覲面然非  
修辭何足以洗心未審中台之餘輝能照微尚之或  
否恭惟 某官孤忠貫乎霜日百蠻震乎威名當其  
立朝社稷豈徒于九鼎及其乘塞金湯不在于長城  
頃登樞庭頓起國勢使朝夕謀謨于廊廟則笑談整  
頓于乾坤惟其持方而入圓是以易問而難合初來  
洪府覺西山爽氣之愈清旋鎮荆江喜赤壁風流之  
未遠將克復神州之是恃何卧護北門之足云登庸

之期跬步可冀某迂無所用老復奚為題慈恩之名  
要自是門生一人之數受新吳之邑獨後於屬吏半  
年之間尚憶拜公于道林嶽麓之時頗辱借譽其波  
濤雲霧之句雖前古所謂之知己未必有之故半生  
不幸于無曹得此足矣向者居中而未嘗密今茲在  
外而不敢疎此豈緣勢利而相求庶幾蒙肝膽之洞  
照其為歸倚罔既敷宣

起居李宣諭察院啟

高子美



天下澄清攬轡爭傳于孟博海瀕竊伏峩冠輒効于  
不疑大勞交口之先偶容爭一言而執手荷知云至  
俯已奚堪念違去于星躔俄薦更于月律敢荐僭置  
函之禮少伸賀厦之私恭惟 某官直幹剛方冲襟  
凝遠蜚英聲于早歲蹤清選于明時坐鎮北臺森若  
在山之藜藿遠持蕭斧悚然當路之豺狼思言共猷  
于來宣本業皆期于自反律貪薄而歸忠厚變愁嘆  
而為嘔吟皇皇者華風望已光于原隰肅肅其羽飛

鳴行博于雲天某蓬華寒生箕裘末學姓名誤塵于  
仕版功業難遂于亨途調職漢池悵舊都之悠邈擬  
司衡岳驚新格之變更將易地以求安賴依仁而克  
濟自初攝局不靳提衡寬其逆旅之懷示以試人之  
漸然曾參為孝行不忍于離親而毛義所縈心常急  
于捧檄未容繼請何幸得圖不令單騎之冷官每看  
雲起與灑一封之和氣又逐春來眷茲終始之恩永  
有依歸之地肯陽在序淑今已行宜倍保于粹明式



茂綏于福履願言之極敷述已殫

起居憲使啟

李成季

講聞高譽雖懷仰德之勤奔走宦遊未獲依風之便  
比叨屬部猥託臣庥將觀使節之華遂如昔日之願  
恭惟 某官器周物表識洞幾先早膺中宸之眷求  
特委東州之廉按奉行邦憲方曲盡于怨心進對楓  
庭將入參于近輔即期迎拜倍切懽愉

起居呂漕啟

張芸叟

早遊西學曾奉先塵顧書謁之闕然獨瞻依之勤正  
物華向晚歲叙時更諒惟啟處之和允有神明之相  
伏惟 某官學窺神聖聞心潛道樞傳孔孟之精微  
陋苟韓之出入經惟策府先諸彥以登瀛使節皇華  
總連城之攬轡矧茲汾晉介彼羌戎方聖主之憂邊  
簡名臣而出使少假阜通之績遂居獻納之榮并部  
正寒邊勞方劇尚加調于吉履以前御于泰亨向德  
何從窮摠懷莫既



起居提舉啟

張芸叟

向風之久為日已深去國飄然願莫深伸于披覲登  
朝籍甚聲已講于流聞未諧歲記之修難盡傾馳之  
素伏惟 某官材優國器道炳儒珍博通今古之宜  
兼備員方之用上心乃眷早膺密勿之求民政是先  
出奉澄清之使少需報政方仵疇庸將式副于僉前  
遂允升于華貫時寒在序歲晏將更諒視履以均和  
有神釐而顯相冀尊頤養前御泰亨善頌之誠文言

莫究

起居鹽使啟

趙德莊

繡衣直指有嚴攬轡之行弩矢前驅獨後望塵之謁  
占星華之下燭偃風化以增勤恭惟 某官天爵崇  
高卿才偉秀据經論事蓋七相五公之傳貫通立言  
皆三代兩漢之作自拔茅而連茹爰盛飾以入朝直  
弦恥比于曲鈎方枘果乘於圓鑿三仕三已非吾黨  
之戚忻一死一生與善人而進退逮羣陰之殄弭偕



眾正以來歸歲寒灼見于後凋晝日對揚于三接方  
欣賈誼道宣室之鬼神豈意宗元為尚書之牋奏歎  
虎豹憎人之遽偉雷風孚號之新任山甫以將明初  
未嫌于內外議李悝之強富實有係于本根少慰江  
湖之心遘膺廊廟之拜某陸沉末路山仰大名蚤愧  
巫醫未適師傅之願晚興章服徒興俗狀之嗟維昔  
先君獲承汎愛撫歲年某既遠悵門戶之寢衰東里  
方孤正賴威嚴之霽山公猶在不知意氣之傾首夏

恢台雄臺清簡願厚將于德履用俯答于輿情

起居提刑啟

朱子發

警夷下塞常瞻燕几之遙託問遠郵阻贄使臺之遽  
方秋欽物絢惟寢餼之和以德召祥當有神明之相  
恭惟某官器識愜重風稜整嚴以德望自高以忠  
義自處重恤威獄受宣惠和民忘濫寃上所眷何行  
趨密勿之地大展澄清之才某託庇最深瞻風正邈  
祈精夙夜之眷仰對邦家之光



起居監司啟

崔德符

近馳單介輒貢柔絨屬大旆之載驅跂行臺而莫及  
第憑疾置冀躡清塵諒乘隱几之閑獲布戀軒之懇  
即日伏惟 某官肅臨使部甫憇軺車履華月之載  
陽順生經而協吉竊以荆楚悉多于秀士屈宋殆有  
其遺風緬惟攬轡之餘不乏濡翰之詠高情寓物吟  
成春草之篇妙思有神賦得青峰之句伊江山之有  
助宜咳唾以爭增妍更期藹政最以上聞促鋒車而

入覲獻納雲臺之表翔趨紫殿之班英譽聳乎朝端  
正論聞於天下然後寵協夢卜峻秉鈞衡某以朽疎  
辱紆盼睽聯絲緝縷僅成翫散之文舉秀韜瑕曲玷  
獎題之日銜恩有素結戀無涯禱頌之情倍百倫等

起居運判啟

陳師禹

披風在昔嘗附英游嚮德于今莫追雅素徒有傾馳  
之切均乎鑒寐之勤歲事將更寒威正苦諒惟福履  
有天和伏惟 某官道直而方德恂以粟器備經



權之用學兼今古之長物議所歸眷宸心而久簡邊  
儲方急持漕節以來臨雖出使一方未伸志畧而歸  
朝三接可伫搏飛尚惟啟處之安加頤節宣之養急  
登要路少副瞻言

起居吉守啟

鄭敦夫

頃丞畿邑託庇雲陰今倅鄰邦密資河潤蹤跡雖云  
幸會周旋蓋有夤緣恭惟某官學有家風才惟國  
器飾吏事以經術結主知以猷為領袖百僚藹著端

方于棘位袴襦千里稔聞豈弟于棠郊行奉芝函入  
陪荷橐某顧惟絲菲曾賴幘幪縻係塵蹤冠履阻隨  
于後乘跂瞻德宇襟懷順沂于長江朱夏正隆黃堂  
多暇惟敷施于陰德諒翕受于繁禧

起居太守啟

崔德符

鄙朴無華罷軟不振日積簡書之畏居多簿領之憂  
闕布私誠冒塵燕几伏惟即日涉茲秋抄益練天和  
坐嘯優游視履恬福恭惟某官疏通成務豈悌宜



民閱義理以為多藹聲名之藉甚承流宣化日底于  
成功增秩賜金行膺于寵數某猥牽微祿辱在下陳  
實賴廕庥庶安孤拙

起居蘇守啟

王德立

風擁旌旄異最已騰于蜀右載膺綸綍餘波將決于  
湖西凡屬庇庥舉增歡忭恭惟某官凝姿開爽種  
學淵深文章克家挺挺有祖風烈行義厚俗顯顯為  
世聞人妙簡宸衷亟躋禁從翱翔瑣闥居多獻贊之

謀出納文昌薦被直清之命未調鼎鼐聊寄藩垣宣  
化承流諒益寬于幽顧處中當軸行即聽于登庸某  
竊伏聲猷喜親教約尚遙謁合欲進拜而未前進仰  
光塵顧飛緘之敢後

起居蔣守啟

李成季

少學屬文嘗起執鞭之慕晚從試吏濫陪入幕之遊  
稍親閒燕之談良苦喧囂之役遽緣補外遂失依仁  
鷦鷯一枝暫託蹤于美蔭鴻鵠千里徒絕睇于青雲



仰惟剴決之餘俯有吉祥之助恭以 某官識周萬  
理學造大原以王佐而自期非聖言而不道躡賢科  
而特起軼俊躅以先馳彈擊百僚皂鵬橫漢澄清屬  
部皎鏡懸秋優服使華增嚴帥領泉流六路半居天  
下之利源膽落諸羗獨出幄中之勝算重以儒林舊  
德延閣清班未親日月之光屢從軍旅之政暫屈輟  
藩方之節制用釐天府之浩穰初落筆以無留不閱  
旬而稱治大黠卷舌情窮片言羣偷屏心首戴一尹

方久虛于近弼已密簡于上知意在本朝顧未伸其  
素業天將大任宜永庇于斯民某竦服誨言悵拘官  
守地遙望履心劇戀軒浩蕩江湖何待飛鳧之集低  
徊燕雀終懷賀厦之歸敢乞勉為邦家精調寢餼

起居鄰守啟

行郵濶畧曠馳欵啟之音大府重深徒仰浚明之德  
茂惟鎮俗之暇克擁自天之休恭惟 某官學際聖  
真才高名世良二千石果膺治主之求課第一人行



見褒書之下某濫叨貳政獲庇鄰封顧韁鎖之坐拘  
莫親高範雖馬牛之不及尚借餘光參對末緣傾依  
至切願保寢興之美益介福綏之休

起居鄰倅啟

郭中行

分符謂已愧非半刺之良擊柝相聞殊慶比賢之吉  
徒有德音之辱尚疎記奏之勤逖惟燕閒休有協相  
恭惟某官器能通博風度醞深薦更寄委之繁夙  
振清修之美豈茲別乘可屈遠圖伋顯效之寔彰副

公朝之明陟汁光御政和叔司方伏覲上為邦家精  
調寢饋

起居鄰倅啟

李子思

結好鄰邦幸及餘波之潤被官半刺阻陪揮麈之談  
月吉薦更郵書稍闕逖惟副貳之暇動協神明之休  
恭惟某官德宇渟深聲猷聳邁游及久當于煩劇  
宅心自處于高明某濫以散材謬當矧乘鄉閭已熟  
于風化治境又托于芘庥仰德實勞馳心孔疚方應



鍾之在候宜吉履之順時伏願上為廟朝精調寢饋

聖宋名賢五百家播芳大全文粹卷八十七終

聖宋名賢五百家播芳大全文粹卷八十八  
上啟

上師相陳情啟

鄭敦夫

大鈞獨幹諒無間於消塵小已自私冀偏承于雨露  
蓋有意于保全者物類之妄意而無心于典決者造  
化之本心既將授絕壑于與深崖安得不跼天而躋  
地竊念某讀書無用仕宦不諧偶管蒯之求誤寘摺  
紳之列炭冰寡偶合獨僻見而守株燕楚背馳遂冥



行而觸網時逢明盛身免誅夷聊從寬典以示恩姑  
屏遠方而不齒日月歲時之易邁艱難險阻之備嘗  
六年之瘡痍交攻命存如綫百指之飢寒未免地置  
無錐何期蟣蝨之軀幾啣虎狼之口浮家泛宅萬死  
一生眼看荒壘之荆榛寸心欲折夢繞故園之松菊  
何日歸期清時難遇而直道難行化力易為而窮途  
易德此時遭際沒齒歸依恭惟 某官吾道宗工本  
朝元老以孔孟明道之學為學以伊周濟世之心為

心傳詩書禮樂易春秋之所不傳見唐虞夏商周漢  
晉之所不見淹貫古今于典籍未嘗一物之不知兼  
存夷夏於生靈宜忍一夫之失所豈令寒賤獨漏甄  
陶已甘絕意于簪纓姑欲脫身於羈絆一邱一壑若  
猶獨自遂於簞瓢寸髮寸膚皆是更生之骨肉情悰  
所迫戰汗奚勝

上湯相陳情啟

耿元鼎

士為知己者用大賢何所不容物不得平則鳴唯善



能舉其類伏念某頃在丙辰之歲仰當太上之朝金  
人再犯於淮南鐵馬大陳于上江值南渡奔波之後  
屬東還蹈海之餘侍衛單寡而無君子之軍轉餉空  
虛而乏小人之食乘輿既駕會宣王政事之甫修干  
戚攸陳過漢官威儀之未復百揆亟從於舜狩六蜚  
暫駐于吳門民情已危國事是未定或贊親征之後  
遂云罔有敵于我師爭陳善勝之機自謂不以賊遺  
君父惟時上宰專彼長謀既召公不悅于周公豈晁

氏獨安于劉氏効畎畝愛君之意分草茅言事之忠  
顧越俎代庖惟一相是論人主職然跳丸解難欲二  
人同心海內安請如平勃之交驩圖緩文武之一怒  
留陽城而伏闕泣賈誼以上書事不果回身其能免  
衣冠有此第喜憂國之蕭公鼎鑊在前豈忍愛身于  
臨賀命輕一葉恩重萬鈞止從會稽聽讀之行旋被  
長安釋歸之命桀堅素志未報明時逮後來當路之  
臣惡昔在登門之黨投蛾火內匪自揆量見蟬水中



其如最惴恐偶預省闈之羣試中遭鄉里之一夫謂  
易名猶慕于相如宜伏罪坐連于德裕狀乃事於都  
省指網踈投北之人下其文於曲臺使路絕圖南之  
便野芹雖美誰將獻御以成癡仙鼠弗靈自擬昇天  
而復墜已侵尋于白髮久流落于滄洲所以為貧未  
能免俗看人一第了無拾芥之勞閱歲三星返作覆  
焦之夢所幸泥塗之辱河海之豪好在日光猶可射  
牛背之上依然髀肉非無事馬蹄之間一坐盡傾何

言小異十手所指敢愧前修是用布其腹心亦云適  
此機會常藏舟已久恐有力者負之按劍弗疑非無  
因而前也共惟 某官才高三傑道合四聰擅燕公  
之大手而定社稷有功躬博陸之小心而酌古今能  
斷兩朝注意迭居二相之尊萬里折衝盡護諸軍之  
眾入齊魯侯之壽母加稱漢代之宗臣共慶明良之  
逢大膺重疊之賞福不虛應澤當廣施有一言可以  
興邦其上策莫如自始今日之事幸而集諒無忘善



後之圖中興之業誠惟難願永懋字先之贊有如愚  
陋必恥賤貧何諸大夫皆曰賢然後用之終不起倖  
門之望雖明天子在上可出仕矣亦少俟翰場之興  
以素荷于慈憐姑少陳于困躋清霜在候愛日回春  
倍蘄茵鼎之調悉慰紳綏之祝過此以往未知所裁  
上憲使納拜啟

千佛名山夙仰塗金之姓諱五經閣下曾為問字之生  
徒有一於茲且當修好問二宜拜安得忘言共惟  
某官名世真儒褰帷俊使卓然君子之操綽有古人  
之風昔我先人登科辛未題名未泯小祿猶存肆及  
孤生執經鄉校濫廁老聃之役剽聞夫子之言自別  
師門荐更歲律爾夤緣于吏役獲趨造于賓籤我有  
二天已獲披雲之願拜下兩手敢忘屈膝之勞諒黃  
壤同年之心無青雲異日之誚敢祈端授毋事虛謙  
某謹當尊所聞而行所知或有為于斯世進以禮而  
退以義庶不屬于通家



上太守納拜啟

張芸叟

書不盡其言禮止飾其貌先生為之度數君子尚乎  
中行作而改易其顏色則謂之恭下而屈折其體支  
則名曰拜用是所以事長不然何由貴賢苟非達尊  
之備三安得太祝之辨九恭惟 某官著龜吾道衡  
鑒士林言為典刑行建規表當總角之歲固已想聞  
其風茲蒞政之來幸得親炙其義每因心而造請必  
亢禮以周旋處不遑盜退而內訟子夏之門人區別

容有後先次公之曠吏未除猶能拜起然事契不淺  
無言則已疎勞謙雖光過行則近 在累朝之典故  
亦云隔品而致恭稽唐室之上風獨有年家之叙拜  
幸免再三之避庶申悃幅之情

上宰相啟

孫仲益

憔悴行吟未脫江魚之葬而慟哭流涕遽興風木之  
悲鑽燧火以求新御祥琴而永嘆收召兔魄僅存偷  
生久矣逃空恍如昨夢偶未填於溝壑尚有異於桑



榆苗槁欲興大鬱雲霓之望鷄鳴不改詎垂風雨之  
期共惟 某官巨力回天彌文作古任重道遠可謂  
大臣言聽計從簡在上帝輔成致治保邦之業益彰  
繼志述事之光屬怨敵之紛更汲朋邪之彙進誦詩  
發家籍交執仇含珠何為方聽大小儒之議佩劍相  
笑遂成南北部之謠戰蠻觸於兩角而交兵鑿混沌  
之七竅而報德不虞忌器幾至焚廬式開賚弼之祥  
光補廣文之教 譽阿毀必也正名助墨逃揚不為

已甚一變旁僻曲私之俗遂濟上下交泰之期所謂  
眾賢咸和於朝豈有一夫不被其澤伏念某寡徒少  
與多病早衰始畏途而問津遂營巢而擇木比大鋤  
於非種固難遁於深文眾怒所遷幾類水中之蟹一  
揮而去又同瓜上之蠅方嘗膽於訟愆俄茹荼而遭  
閔永惟事親飲養之志弗泊於千鍾獨有懷恩未報  
之身所欠者一死塊北大鈞之所播激昂三鼓之既  
餘雖萬里一空其羣靡有留良之歎而四蛇各入其



宇豈無獨怨之求况君子樂得於英才繫大臣不忘於微賤石田無用顧求無望歲之期焦穀可芽當大費噓枯之力

上秦少保啟

張全真

頃罹憂患幾隔死生不自意全得以至此雖自念疾困凶衰之迹未宜踵高明盛大之門仰託知憐敢忘冥昧伏念往歲比試羣儒方時於經最高唯公奏策第一京師尊貴材鮮可踰天下想聞人爭先覩而乃

獨韜藏能事謙禮諸生不問賤微悉啟契好而某也竊科最下進竭云初獨於眾人之間而以國士見遇傾意氣以相許非流俗之敢期方幸從游更蒙鈞禮士固伸於知己誠豈能忘生而得此於人蓋實所寡每思磨厲用副推稱夫何某殃罰及身喪亡無日生理不治氣息僅存廼者某官榮升諸公下澤四海願嘗有嚮者慕用之意而適當在纍然憂服之中書疏不脩禮文俱廢獨竊聽輿人之誦而益欽長者之



風未省餘年猶有見日共惟 某官道德純懿學術  
通明既迪簡而在庭用承弼于厥辟正直是好有勤  
勞王家之勲寬裕以容懷長育人材之意顧如衰陋  
何所短長姑襲衣冠以持門戶固知夫時命有所不  
敢以賤貧為羞然而踵父之業未能事生之道或缺  
負米有志乞食何顏持是安歸非公無可惟大臣務  
為國得士而君子樂以祿及親論其為士則或有可  
慚至於養親則尤其所急於斯二者儻垂芘冒之仁

則有一馬願竭始終之報

上政府啟

趙承之

抱釁銜悲悼死亡之無日愒陰玩歲迫祥禫之既除  
分甘溝壑之填敢有竿牘之獻仰膺詔命復齒人倫  
勉自強於面顏冀獲承於興寢侯惟孳歛氣乃肅清  
共惟 某官贊襄廟堂填拊夷夏神明所助戩穀來  
綏某荼毒尚新疲病如昔卧漳濱而太息阻造駕行  
叫帝閭以嗚呼冀充毆腹華天鈞之塊北閉蟠木之



輪困特加陶冶之私俾伸蓬華之願雖江湖鳧鴈無  
捐益於平時而犬馬蓋惟足彰明於厚德鄉風而問  
延頸以須歲時杪以向寒時在陰而務畚願盛起居  
之適益遵調護之宜依歸之深梗槩于是

上從官啟

計敏夫

久去門闌僚下風而仰止退依苦塊寄餘命以惟然  
迫於禮制之除汙此朝綱之舊敢脩問訊復冒覽觀  
惟秋既深在氣已肅仰惟禁密之暇休有吉祥之多

某屬猶薰心跛僅能履尚嬰罪謫敢彈貢禹之冠雖  
欲馳驅實曳伏波之足已抗章而自列祈置散以少  
安願蒙篤愛之私特許餘光之借候將改歲迹阻造  
門願遵調護之宜無爽宿宵之衛其為懇至靡所喻  
言

轉廳回韓觀文啟

韓丞相

祇奉明恩謬陞上轄雖剡章而引避終渥寵以難回  
自顧缺然居常惕若伏念某賦才菲陋起迹羈孤幸



蒙累聖之誤知遂極一時之顯設簪筆以游禁闈秉  
籍以長吏曹迨參弼翼之聯何補朝廷之務不能則  
止徒懷知恥之心無勞而遷數冒禁材之謗榮憂交  
萃啟處弗遑此蓋伏遇 某官推轂人才指南物論  
夙借言揚之賜致茲眷任之殊具在感銘豈勝敷叙

轉廳回外任兩制啟

韓丞相

謬膺恩制進守省綱懇避弗遑兢憂深甚伏念某才  
非適用仕偶逢辰荷累聖之誤知極一時之顯遇參

陪近位荏苒周星迨聯丞弼之司何補朝廷之事荐  
蒙渥寵愈愧斐能茲蓋伏遇 某官志在同寅愛行  
樂與夙加推引到此叨踰荷芳翰之見貽積感悚而  
良厚

回文太師辭免還洛啟

竊承懇避政機願還里第士心惋愕睿意遲留囊奏  
弗愈公車復上者六七詔書來下使人面諭者再三  
况聞徧救於有司毋得亟通於所請重貽教翰尤切



愧棕伏以 太師紀象雲臺銘功彝器朝相仁祖以  
躋嘉祐之太平謀謨先朝克奉英皇之遺緒堯武業  
於甘陵之下首忠策於至和之間近起菟裘再隆師  
席矧惟二聖之謚治方賴元臣之贊襄况雖卜爽於  
天俛况已臻於藥喜冀體中宸之眷勉趨路寢之期  
其在勤倦固難敷悉

回韓丞相辭免啟

光奉制函顯陞宰席凡居陶冶靡不懽愉詢謀已出

於簽同抗疏尚聞於懇避伏惟 某官養氣剛大抱  
才敏通蚤逢同德之辰自奮有為之業忠能任重雖  
蹈險而不移厚足鎮浮常處難而若易蒙知先帝久  
樞協翼嗣皇親扶日御風著著明之望宜登勵  
相之崇願屈固辭俯從師錫

回韓丞相判北京辭免啟

誕布冊書寵升公衮顧在耆明之重宜兼將相之崇  
睿眷素隆師言久協尚深冲避固鬱具瞻伏惟 某



官望冠羣工道符熙運大忠至正誠為邁越於昔賢  
近弼遠臣孰不儀刑於元老惟安危之注意屬文武  
之全能矧先帝之見知宜時皇之圖舊參榮中鉉視  
秩泰階廼從西洛之符再換北門之鑰冀承溫詔仰  
副清衷某特沐謙勝何勝佩悚

回門下韓侍郎辭免啟

文穎叔

光奉宸恩進陞省闈蓋徇僉同之志難從謙挹之私  
伏惟 某官直道在躬重名冠世愛民如子藩宣皆

愷悌之仁許國若家獻替罄忠嘉之論壯猷彌劬晚  
節弗渝久席寵於禁嚴乃侍言於殿渥果躋柄用久  
協士心長孺知經父子繼登於三事彥將替古兄弟  
同貴於一門顧輿頌之交歡雖露章而莫遂冀膺明  
命早副具瞻

回王左丞辭免啟

石懿文

席寵制書冠榮省轄問望所屬懼忤攸同伏惟 某  
官溫厚以明惠和而敏以學術藻飾吏事騰耀士林



以忠義輔翼政機被知宸宸果副搢紳之論蓋升丞  
弼之崇尚執謙光未膺成命重蒙流誨曲示冲懷冀  
回懇避之誠上副倚毗之意願言銘禱曷罄敷陳

回使相啟

伏以衰境倦游方丐辭於郡紱嚴宸過聽俾進讀於  
經惟念叨冒之優隆方凌兢而遜避屢形奏牘尚期  
賜可之音遽辱珍函益佩撝謙之美共惟 某官英  
資絕俗厚德鎮時洞韜略之縱橫得詩書之醞籍擁

貔貅而制勝既分門於將壇冠鴛鴦以通班復視儀  
於宰路勲庸著矣威望隱然邁文武之兼資係安危  
而注意抗茲強敵久勤南仲之城方歸其侵疆允賴  
召公之關國帝衷彌簡公望益崇惟氣序之新涼宜  
福基之增固瞻承尚阻徒遠遡於旌麾眷倚方隆願  
益調於苗鼎

回孫參政啟

李太尉

和門授鉞未奏戎功宸陞出綸旋叨郡寄自惟塵跡



獲通台光蓋有夤緣尤深慶幸共惟 某官鎮時重  
器間世真儒文章黼藻於王猷議論著龜於國政經  
綸事業贊大化於皇扉中屢歲時適雅懷於綠野行  
膺丹詔並復青氈某樸樵無堪併蒙是賴誠未馳於  
尺牘貺先辱於駢緘

回張太尉啟

李太尉

比膺中旨遠討羣兇幸三鼓而得城蔑一囚以漏網  
有征無戰雖憑咫尺之天威適會成功亦賴輔車之

憐助自量繇力略効微勞未釋介冑之塵埃先辱緘  
題之黼藻其為媿感曷既敷宣

回呂太傅啟

張欽夫

茲蒙薰慈委貺戕翰不為華藻無非忠厚之言歷舉  
大猷備嘗切磋之義咏味數過感藏至深伏惟 某  
官世德相傳天資甚茂立志靡追於時好行身力慕  
於昔賢暫分典於泮宮益養成於遠器某相聞雖久  
既見未絲永惟事道之難莫若求人之要考麗澤之



象正資講習之功誦伐木之詩益見和平之助顧驅  
車之寢適知傾蓋之可期所祈有過之必聞庶或臨  
民之寡悔

回張閣學啟

張全真

祇奉宸恩猥叨郡寄方密依於大芘側聞長者之風  
將冒布於尺書已辱一介之使寵貽戕翰下逮鄙人  
竊窺筆墨之光華仰服德意之謙厚內顧不敏罪焉  
所逃共惟 某官材任大臣望隆法從文章爾雅蓋

盡見於典刑論議有餘宜餘聞於政事尚淹在外未  
使居中方今神明之不遺必圖柱榦之固守會聞語  
下亟以公歸某自分迂愚何心游宦顧甚矣衰殘之  
久聊復此來而鄉者慕用之誠於今增劇敢意曲全  
於契好廼蒙備賜於拊存匪惟小子增榮益使孤蹤  
之有恃矣暑正爾燕處裕如諒繁社之方來相直道  
之所履願體眷意加輔寐興瞻頌之深敷宣罔既

回畢致政啟

李成季



謬膺煩使方愧於澄清夙仰高風雅懷於瞻覲遺牘  
未皇於郵置貺音先辱於騰函伏惟 某官藹著令  
名久躋膺仕遂巡易退之節士人共仰於懸車優游  
佚老之榮談笑未承於揮麈即圖披晤深祝保綏感  
系之誠叙陳奚既

回沈提刑啟

李太尉

比膺中旨遂討羣兇偶三鼓而得城無一囚之漏網  
退惟僥倖實藉威稜共惟 某官學有淵源器無塵

滓議論太平之基本文章後進之規摹盛旦早逢亨  
衢濶步羽儀仕路聲華居海內之先俾贊公家財賦  
幹城中之半已深眷注行服寵光某素稟龕踈幸依  
仁厚未拂塵埃之介胄猶抱焦勞遽承珠玉之緘題  
過形撫問

回鎮江安撫啟

翟公巽

假守藩符獲依鄰境封疆密邇相聞雞犬之音政化  
流行不待馬牛之及共惟 某官躬行豈弟體備中



和久推重於搢紳固想聞於風采出臨藩屏糾合義  
師元帥摠戎首預幄中之畫羯胡奔北獨專方面之  
勲乃眷殊方創為輔郡疇咨師帥允籍威名蒙福京  
師已賴洪河之潤倚強王室重增盤石之隆敢謂謙  
光首貽書誨徒佩芝蘭之臭味未脩桑梓之敬恭

回京南留守王侍御啟

陳無已

試守東州初無善狀奉使西道倍有誤恩被聖訓之  
丁寔奉明詔之寬大惟此八州之眾薦更連歲之凶

視彫瘵以興嗟顧闕迂而無術莫寬憂顧徒積兢慚  
伏惟 某官學以名家行為世法隱然天下之望蔚  
為君子之儒比事屬詞名出漢廷之右愛民憂國政  
居良吏之前方此有行未遑政問不圖貶損遽辱褒  
嘉喜懼不勝筆舌難盡

回衢州王郎中啟

李太尉

和門杖鉞未奏戎功宸陞出綸遽叨郡寄顧涼微以  
何取實獎提之有由共惟 某官學海龜龍詞林麟



鳳荷橐藹聲華之素棠郊同豈弟之多皂蓋雍和擁  
節暫頒於屏翰青幢飛裊賜環倚俟於登庸某忝守  
郡符遠資河潤往來扉履獲假道以無虞瞻望門墻  
再承顏之未卜

回柳巖州啟

張欽夫

奉詔牧民方待臨川之次蒙恩易郡更叨桐水之除  
自揆初心敢忘素守已上奉伺之請輒辭乘傳之行  
豈不知在今此州實拱行闕仰雲天之在望知日月

之可依地望既隆民俗且簡几席枕湖山之上簿書  
雜魚鳥之間前瞻文正之風流尚想子陵之節槩叨  
逾過分夫復何言然某方茲退伏於里閭且欲從容  
於學問斯未能信敢言輕試於治人道之難明祇合  
靜求於在己庶幾有得不辱其先日冀大君之仁俯  
從小己之願豈謂山川之阻忽勤魚素之放敢占蕪  
辭少叙鄙意共惟 知府朝議以德履之甚茂全天  
才之有餘惟自處期忠厚之歸故所至於以牧養為



事翱翔中外益著聲猷詠中和之詩已騰聲於近服  
陳治安之策即趣對於明庭某未諧先覩之期徒負  
告新之意敢借偃藩之樂少留坐嘯之娛秋律既深  
霜飈愈厲願體眷毗之厚益精調護之宜瞻頌之深  
敷宣罔既

回方守啟代

鄭敦夫

伏辱撫謙特貽諄誨獎提過分感畏交懷共惟某  
官學術淹該天資粹拔議論太平之根本規摹後進

之先師軒昂妙齡翱翔膺仕累分憂於茅竹暫均逸  
於粉榆琳館優游素蘊經綸之成畫至除簡注並膺  
朝野之具瞻某備乞下僚仰資遺範未遂登龍之便  
徒增希驥之勤

回覃靖州啟

蘇叔黨

狐狸未盡宜鵬鷲之橫飛騏驥先駟甘駕駘之在後  
顧蹉跎之無用雖矍鑠以奚為過辱緘題典垂在籍  
仰君子之有道識仁人之用心感極成悲驚定而愧



共惟 某官才推人傑名擅國珍相有擲筆之虎頭  
終封定遠忠並伏波之馬革不畏蠻溪閭里觀樸之  
懷黃道路聳買臣之衣綉某忝茲別乘預竊依仁方  
殘暑之秋風多生寒之夜雨更祈善躡以永壽祺

回李守侍郎啟

張正己

別德五年瞻風千里豈意專城之任獲依鄰境之光  
恭以 某官才過萬人身兼數器早仕清朝之計相  
蔚為當世之吏師方屬邊鋒暫汙州紱與我共理豈

惟求田里之安入而為公將即備廟堂之闕某曾未  
遑於問訊乃先枉於誨存銘感至深敷陳曷既

回強守啟

孫仲益

蓋凭熊軾而驅方切仰高之慕卧牛衣而泣莫申事  
大之恭敢謂漂流契濶之餘尚勤撫奄矜存之意共  
惟 某官七朝儒學一世吏師萬垂之器晚成千歲  
之姿難老爰屬下車之始遽叨求舊之先著屐歡迎  
詎知折齒撫箏歎詠殆欲挽鬚高節邁倫衰病增氣



諸儒談道所願陳蓋公清淨之言小子學詩猶能賦  
王褒中和之頌其為忻幸莫究名言

回鄰守啟

翟公巽

假守郡符獲依鄰境封疆密邇相聞雞犬之音政化  
流行不待馬牛之及共惟某官心存愷悌體被中和  
久推重於搢紳固想聞於風采某仰承德蔭賴分燭  
之餘光矜式吏師知伐柯而取則不圖謙益先辱誨  
言感佩之懷敷宣曷喻

回沈留守啟

李樂靜

瀝懇乞麾方自規於假守被恩易地猶外摠於祥刑  
視事云初賜函先及伏以 某官雅推令矩久著能  
名請留鑰之臺綱暫資宿望披中宸之芝檢行踐華  
塗覲德未皇致郵不敏良有後時之媿益深內訟之  
私感忤既并叙言罔既

回太守啟

前比貢柔緘幸塵清覽禮无不答盡匪盡言上君子



之堂未遑引袂拜使者之賜疊幸置懷竊惟鎮撫之  
餘茂有福祥之助共惟 某官聲猷華國器業在民  
早膺出使之華尚屈偃藩之寄報政之速固無待於  
暮年聞命而趨將入陞於禁從仁則瞻謁少聲叙陳

回太守啟

崔德符

比祇行役遠追巨藩獲仰覲於下風俾俯酌於素志  
過蒙延勞備極謙冲方結戀於旌麾已曲煩於緘翰  
情文具腆暫佩逾深伏惟 某官渾厚而疏通高明

而敬愿久踐更於要地聊偃息於大邦聽中和之詩  
嘗窈窕於政迹錫光大之寵行峻陟於禁塗某暫息  
驅馳方遙披覲冀布宣之餘暇緩寢餼以惟和瞻頌  
逾深悃誠罔既

回太守啟

趙承之

班列追隨數瞻眉宇川塗隔阻屢易歲華缺焉竿牘  
之修久矣飢渴之念亟聞開府切用鄉風伏以 某  
官發揮懿文揚歷膺仕眷素深於平日名尤盛於一



時未容湖海之淹聊付藩垣之寄北門清切吏豈識  
於巖徐南畝歡呼民但歌於召杜諒少須於報政復  
慶於賜環某智淺憂深才輕責重幸有光輝之託冀  
無罪戾之虞屬未暇於占書已先蒙於賜教仰懷謙  
挹倍切感藏悃幅之私梗槩于是

聖宋名賢五百家播芳大全文粹卷八十八終



